

## Najbolji donatori

Hvala Bogu, privodi se i ova akcija kraju, koja je opet pokazala da Grbavci i mogu i hoće, pa pohvale stizu sa svih strana, jer je za kratko vrijeme urađjen veliki projekat. Spomen-obilježje će akobogda u subotu 23. maja biti i zvanično otkriveno, i biće to čin svih nas kojim se odužujemo našim šehidima i doprinos istini o stradanju bošnjačkog naroda. Potrebna sredstva za izgradnju spomenika, okolnog platoa i organizaciju ceremonije svečanog otkrivanja su prikupljena, tako da se nikome neće ostati dužno. Ukoliko nešto novca i ostane koristeće se za organizaciju godišnjih podsjećanja na naše šehide i obilježavanje stradanja u narednom periodu, jer smo do sada uvijek imali problema da organizujemo i po jedan tevhid. Ovom prilikom posebno bi se zahvalili najboljim donatorima, našem Seadu Šahbegovcu koji živi i radi u Australiji. Pošto je on ugledan član tamošnjeg džemata, njegovom aktivnosti i zaslugama uplacena je i najveća pojedinačna donacija za izgradnju spomen-obilježja iz Melburna. Neka ga Allah nagradi i svi smo ponosni što imamo naših ljudi koji su tako vezani za Grbavce, iako su što bi se reklo na kraju svijeta. Takođe pohvale zaslužuje i Edin Hodžić koji je donirao značajna lična sredstva i animirao članove svog džemata u Austriji da i oni daju dobrovoljne priloge. Hajrudin Berbić je uplatio sam najveću ličnu donaciju od ljudi koji žive u BiH i pokazao spremnost da pomogne svom selu. Oni su pozitivni primjeri, a pohvale zaslužuju i sve naše porodice i mještani koji su i pored teške ekonomske situacije iznašli mogućnosti da se uključe. Najveći donatori biće pomenuti i na ceremoniji otkrivanja spomen-obilježja u svečanom govoru.